

編號 1 號

【遠方個人客】劉玉蕉原作

毋知對哪日起勢，屋簷下恬索索咧！打早，大門啓開，心肝就掛吊等該烏烏個身影，會入目珠來無？地泥下有屎好清無？門一開，探頭看著個係失望，佢等啊等，日頭定定仔徒步，晟到戶檻<sup>1</sup>來吶，空空個鳥竇，等毋著厥主人，佢，等毋著吾人客。

春天，係造物者變奇術個季節。空氣裡肚還圓等有寒天個味緒，過較多個係春天個燒暖，清風撩人，在榮榮個花、嫩嫩個葉莖之間流連，蜂仔同蝶仔也跔等歡喜採蜜！佢帶來生命，該，係毋係也會帶來遠方個人客？佢日望夜想，出入大門時節，總會探頭看一下仔，祈求該遠方個人客，千萬毋好毋記得自家個舊竇。

一陣啾啾滾個聲音對屋簷下傳來，歸屋下人縱<sup>2</sup>等出去，頭臥臥仔看該熟事個身影，舊年個燕仔倒轉來吶，就停在佢兜舊年結個鳥竇項，兩粒烏烏個頭那探出來，四蕊目珠同佢兜對看，算係相借問咧！佢兜有同老朋友見面個歡喜，佢兜用亮亮個啾啾聲來回應！過後幾日，屋簷下異鬧熱，背項銜泥個鳥影，咻啊出<sup>3</sup>、咻

<sup>1</sup> 戶檻：音 fuˇ kiamˊ；門檻。

<sup>2</sup> 縱：音 jiungˊ；身體猛力向前或向上。

<sup>3</sup> 嘿啊出：音 xiú a cudˋ；箭速般往外飛。

啊入，舊竇個上層，緊沿緊大、緊結緊高，會揆著天篷哩喲，阿姆講：「愁麼个，佢兜毋會比你較懶啦！」係唷，在恁遠個所在都尋得著路來轉、會起屋歇，還毋會分佢屙下來，佢正經輸慄慄哦！

拶腹個鳥竇結到差毋多吶，日時頭兩隻燕仔輪流飛出去絡食，夜來一隻在竇肚，一隻站在竇脣。阿姆講：「佢兜輪等在該孵卵哦！」正經，成半個月過，就聽著幼幼仔個細燕仔聲咧，總共有四隻，鳥公同鳥嫋出去尋食該下，佢兜會乖乖在竇肚等，一聽著爺哀銜蟲仔轉竇個聲說<sup>4</sup>，嘴就擘大大搶愛食，做爺哀儕個一輪過一輪<sup>5</sup>飛出飛入，四張嘴像無底深坑樣仔，逐到都嘴擘到大大啾啾滾討食，怪奇個係，爺哀仰會知哪隻餵過、哪隻言食？

細燕仔生幼毛吶，媸媸個頭那殼不時弄啊弄欸探出鳥竇來，鳥公、鳥嫋跔等日頭個腳步還係飛出飛入，無閒泊叔。細燕仔日日大，圓身個幼毛對灰色慢慢轉做烏金個翼毛該下，鳥公、鳥嫋就會半拐半監佢兜學飛，這時節屋簷下盡鬧熱，乜係佢兜盡歡喜個時節。定定仔，這竇細燕仔自家會絡食哩，就恁樣生命過再循環一到，生生不息。感謝這竇燕仔，分佢兜體會著生活中個生趣事，同時乜感受著有阿爸阿姆守顧個幸福。

<sup>4</sup> 聲說：音 sangˊ sodˋ；聲音。

<sup>5</sup> 一輪過一輪：音 idˋ linˊ go idˋ linˊ；一趟又一趟。

編號 3 號

【旅行】林貴珠原作

這個時代每一儕人都有旅行個經驗，對有兜人來講旅行單純就係放鬆心情，也有人認為旅行做得同壓力放忒佢；對佢來講，旅行係人生最有價值個投資，佢想愛去看佢落泥以外個世界。人無旅行過，毋知世界有幾大；無冒過險，毋知好痛惜自家個生命。旅行同人生共樣，你會緊堵著生份人，對生份到熟識，再對熟識轉到生份。你係去到外國，同無共樣國家個人相識過後，你會發現著：原來佢兜生活個空間恁細，外背個世界還有恁多毋識聽過、毋識見過個人同事物！正會感想著，原來人生也做得恁樣過！佢想一哪仔去旅行，增廣見聞、寫出無共樣個人人生劇本<sup>1</sup>。

佢緊想等愛去蹶一座高山，就同老公參詳，決定在日本換新年號個時節去蹶三千七百六十六公尺高個高山。六點天矇光仔，全世界想愛熟識佢個人，在山神廟前祈求一路平安、順序，做登山個準備：買食个人、翕相个人，濟濟楚楚<sup>2</sup>、鬧熱煎煎仔。涼涼個山風，柔柔仔吹過每一儕人個面頰卵，歡迎大家來到這位遶寮。大家用快樂個腳步蹶到半山排，山仔也脫忒青溜溜個身裝，換一身豬肝色個火山石禮服來迎接大家。下晝四點，佢兜就蹶到

三千兩百公尺高來吧，在翕熱个七月天，山頂個溫度係零下兩度定定，大家就先入到山屋休息。

半夜十一點半大家過出發，去蹶最尾一截山路，星仔同月光來做伴，佢牽等你、你揪等佢，大家互相扶持蹶上日本最高個高山，該時節，大家早就汗流脈絡。企在山頂看往下<sup>3</sup>，山風颼颼滾<sup>4</sup>，彎彎幹幹個上山路，變做一條金若若仔<sup>5</sup>個龍，纏等山崗鑽入雲海。臨天光邊仔，大家耐等<sup>6</sup>冷風，等等日頭泅出雲海。一下仔時間，日光就同大地照到光光光，睂眼到人個目珠強強會擘毋開。日頭著等啾紅個禮服同大家攏手講恁早，每一儕人都感動到目汁同汗水分毋清楚，這係佢這一生人看著最闊、最遠、最錫人個景緻！大家在火山口辽一輪<sup>7</sup>過後，就滿足個下山，完成咧這擺艱難個挑戰。

旅行個重點毋係愛去幾多地方、看過幾多風景，係旅行轉來過後，自家有麼個改變？有兜個風景，你係無企在高高個地方來看，毋知佢哪錫人；有兜個路，你係無去行過，無法度感受著佢個靚。每一擺個旅行都有厥個意義，對佢來講，係透過旅行尋著真實個自家；旅行分吾個生活改變盡多，無論係對旅行個看法，或者係對人生個態度，旅行係一種拂毋忒個甜蜜回憶，盡錫人尋味。

<sup>3</sup> 看往下：音 kon gong' ha'；向下看。

<sup>4</sup> 颽颼滾：音 xiū xiū gun`；風吹過的聲音。

<sup>5</sup> 金若若仔：音 gim' na na e`；閃亮如金。

<sup>6</sup> 耐等：音 ngai den`；忍受著。

<sup>7</sup> 辽一輪：音 din' id` lin`；遶一圈。

<sup>1</sup> 劇本：音 kiag` bun`；劇本。

<sup>2</sup> 濟濟楚楚：音 ji ji jio jio；人多、來回走動貌。

編號 4 號

【講毋出个心頭痛】曾秋梅原作

吾屋下耕種大，爺衰逐日做到兩頭烏，吾姆愛去田坵仔做事，就會喊𠵼去尋阿明叔寮。𠵼最毋好尋阿明叔寮，因為每擺同佢講話，佢淨會同𠵼緊笑，嘴咿咿哦哦緊講，𠵼聽無半句，比手畫腳𠵼又看毋識。無法度，阿哥阿姊佢兜去讀書吶，伸著𠵼這隻吊尾錘，高不將同阿明叔共下寮。

阿明叔雖然講該咿咿哦哦無人聽得識個話，毋過佢盡煞猛，打早先牽牛仔去食草，食到差毋多時間，會同牛仔逐轉來交分吾爸去田坵仔犁田。臨暗頭會起火煮飯、暖燒水，同燒水攞到浴堂分𠵼兜洗身，又還會泡神茶去廳下點香奉茶。吾婆有恁煞猛又體貼個係仔，佢還係盡少開懷大笑，額頭總係鎖緝緝，心肝肚有一隻結。

聽講阿明叔會啞忒毋係天生个，佢兩歲个時節還盡好講又好搞，係一個活跳精靈個細人仔。阿明叔會啞忒个原因，主要係吾婆佢兜該央時個時代。客家婦人家毋知係煞猛抑係命歪，早早跣床煮飯、餵雞鴨、洗歸家人个衫褲，還愛捲手做田項個事頭。食

飽晝，想愛眠一下仔<sup>1</sup>都無法度。先同晒燥个樵草、衫褲收起來，再同衫褲摺好勢。核火灰去田坵仔，順續仔割一擔豬菜轉來煮汁餵豬仔，還愛遽遽煮飯赴歸家人食夜。等到碗筷檢擎，洗好身，既經癢到無精神去搭細人仔咧。

醫學還無恁發達個年代，生活苦，大家个三餐都顧毋擎，身體無爽快，哪有閒錢去醫院分先生看，便藥、草藥罔食，愛等到該兜藥仔食毋著、病到傷重<sup>2</sup>咧，正會拜託先生來屋下看。

有一日打早，還係細人仔个阿明叔軟怠怠仔又合眼擘擘仔無停動，吾婆摸著阿明叔發燒，隨手對壁項吊等個藥包仔，拿一包「阿不多」分阿明叔食。毋過到晝燒都還無退，高不將帶阿明叔坐三輪車去屏東河南醫院分福盛先生看。唉！「三門四毋著，行船堵著對頭風」，福盛先生出外去同人看病吶。

阿明叔就恁樣燒過邊<sup>3</sup>，對該下起勢，阿明叔就聽毋著也毋會講吶。見擺係聽人講著阿明叔恁精靈可惜係啞仔，就會刺著吾婆長時間圓在心肝肚個苦、無人知個痛！

<sup>1</sup> 眠一下仔：音 minˇ idˋ ha eˋ；小憩片刻。

<sup>2</sup> 傷重：音 songˊ dong；很嚴重。

<sup>3</sup> 過邊：音 go fang；超過。

編號 5 號

【版圓情，爺衷心】徐熏琪原作

人生，總會有一種味緒恬恬仔圓在心肝窟陪等過日仔……。

從細佢就歇在白石下个山峯背，茅屋、泥壁分屋下人遮風抵雨過生活，戶檻<sup>1</sup>、籬笆掌等佢無愁無慮个童年，這種家境係佢記憶中最靚个一扇景色。

該係民國五、六十年臺灣民生經濟正起步个年代，爺衷心連續續降七、八個細人仔，在恁艱辛个環境愛同子女牽成到大，實在無恁該！還記得，見擺食飯阿姆就會講：「細人仔有麼个食麼个，番薯籤準飯划，天生天養乖乖大。」又講：「飯祿划<sup>2</sup>淨莫打爽，座粗無座爽。」這兜話從細聽到大，佢毋單止聽入耳還聽入心，一路里來養成痛惜食物个好習慣。

家境貧困个日仔，閒時間節細人仔哪有零星錢買零嗒來食！惱起來，佢盡望就望過年過節打版仔个時節，目勾勾仔望等阿姆去米店糴<sup>3</sup>糯米轉來、目金金仔看等阿姆浸米、眼晶晶仔看等一圈

又一圈白鮮鮮个米漿對磨石觜流入版袋肚，佢看到骸唷唷仔<sup>4</sup>——口涎水緊吞，就緊問阿姆：「還愛幾久正做得亾版仔吓<sup>5</sup>？」佢總係笑笑仔應：「戆嫲！細人仔有耳無嘴，恬恬看！」戆戆个佢就恬恬看阿姆拿紅索仔，摺裝好米漿个版袋放在長凳板縕縕、硈畀燥，等過半晝邊仔，阿爸就會同細人仔喊兼來攤手亾版仔，佢一手、佢一手，毋使幾久，版仔就亾好吔！再你一粒、佢一粒，一下工一毛籠就裝滌大粒細粒个版圓。還記得逐擺接版圓，阿姆就會講：「惡手毋當兩<sup>6</sup>！」該央時毋知頭天个佢，總係會跔嘴尾唸，嘵毋知這句話蘊含麼个人生个道理，等到自家成家立業後，正知得這句話原來圓等一種味緒。這種味緒有爺衷心「接版圓」个人生味！

佢認為版圓愛好食毋單淨愛真材實料、鹹淡愛堵好，盡要緊个係共心个溫情，用手工接出來个版圓特別有味緒、特別錫人食！想來，人生，就像版圓共樣，愛磨、愛硈、愛亾、愛接、愛有鹹淡，正有味緒！逐粒版圓裡肚就會圓等每儕人佢最寶貴、最值得珍藏个溫情，肯磨、肯接，煞猛打拚總會換來自家盡好个人生，不管係鹹、還係淡，在在就係「圓滿」。

<sup>1</sup> 戶檻：音 fuˇ kiamˊ；門檻。

<sup>2</sup> 划：音 paˇ；把食物撥進嘴裡。

<sup>3</sup> 糴：音 tag；買入穀物。

<sup>4</sup> 骸唷唷仔：音 goiˊ iogˋ iogˋ eˇ；渴望吃東西的樣子。

<sup>5</sup> 吓：音 haˇ；表疑問語氣。

<sup>6</sup> 惡手毋當兩：音 ogˋ suˋ mˇ dong liongˋ；再厲害的人也比不上眾人的力量。

【搞頭王】曾秋梅原作

放寮日，天矇光仔，細人仔就會分大人喊跪床，去田坵仔捲手割田脣草、掌牛仔，無人敢搵在眠床。無細人仔搞个禾埕，恬靜到連狗仔也懶拐拐仔，搵在花樹頭下啄咕<sup>1</sup>。毋過當晝一過，歸禾埕仔都係細人仔在該搞，喳喳喊喊，吵到屋頂都會掀忒。

阿正係有名个搞頭王，當晝頭老人家愛睡當晝，佢就偏偏愛同一大陣半大細仔个細人伴仔在禾埕項搞球仔，你擺過來、佢擲過去搞到當暢樂。球仔係無生著目珠擲到叔婆廝屋下，該就艱辛哩！叔婆斯係惡到有名个，阿正天毋驚地不怕，就淨驚叔婆定定。有一擺，佢蹣等腳尾<sup>2</sup>入去尋球仔，無想著叔婆拏等球仔、齧牙醒齒<sup>3</sup>大聲罵：「你這兜細亞仔攏死人，分人睡一下當晝都毋得，球仔破忒去，看你兜愛搞麼个！」阿正嚇到面呷青，瀉一路出，企在屋簷下，噃噃哢哢悶到腳緊蹠。

臨暗頭，阿正就湊大家在禾埕搞圓人尋。伙房屋像老鼠窿，佢兜細人仔春上圓下，驚分人尋著連糞缸也走入去圓。阿正膽識

<sup>1</sup> 啄咕：音 dug` gu`；打瞌睡時頻頻點頭貌。

<sup>2</sup> 蹣等腳尾：音 ne den` giog` mi`；抬起腳跟而靠腳尖著地著。

<sup>3</sup> 齧牙醒齒：音 ngad nga` sen cii`；咬牙切齒、凶惡的樣子。

盡大，跳入豬欄裡背圓，無細義嘎跺著豬子，豬子痛到吱吱滾<sup>4</sup>，阿正嚇到飄出來，好死毋死徑著豬籠嘎橫著，額頭撞著豬欄起一隻瘻，分厥爸打到喊毋敢。

熱天个時節，莊下個細人仔盡好去河壩搞水，搞啊搞欸，毋使使錢就學會泅水仔吔。西北橋下個河壩水係三合水<sup>5</sup>，三合水會合個地方就會形成波螺皺，係對岸頂看啊下盡得人驚哦！

有一日，阿正又湊等大家去河壩洗身仔，該央時，細人仔去河壩搞水大家都同衫褲脫淨淨在河壩跳上跌落，無麼個好見笑个。大家搞到當興頭個時節，阿正對橋頂煞力牯飄啊下，唉哉！「四溝水<sup>6</sup>人蹬牛屎——的準<sup>7</sup>」，嘎飄落波螺皺裡肚毋見忒！共陣個細人仔驚到大聲喊：「救命啊！有人沉忒吔！」好得阿正个命恁靚，該時節堵好有一個在河壩脣掌牛个後生阿哥，佢聽啊著有人喊救命，牛索一放，煞煞飄入水肚，同分波螺皺唔入去个阿正救起來。

人講：「大難不死，必有後福」，搞頭王阿正出社會了後，正式在臺北做頭路賺盡多錢，對莊項個修橋鋪路出錢盡大方。還過對救厥命个恩情人，過年過節定著會大攘細攘去厥屋下答謝，無一年識跌忒過。

<sup>4</sup> 吱吱滾：音 gi gi gun`；狀聲詞，痛的叫聲。

<sup>5</sup> 三合水：音 sam` gab` sui`；三方水流交會的河水。

<sup>6</sup> 四溝水：音 xi gieu` sui`；屏東萬巒地名。

<sup>7</sup> 的準：音 dag zun`；非常準確、精準。

【漚雨】張美容原作

恁久來，逐暗晡个落雨聲，總係像躁光<sup>1</sup>个細人仔，在佢半睡半醒个夢中，噦噦嘶嘶<sup>2</sup>、串上串下，無一夜有好恬靜恬靜睡目。想起頭擺人聽著雨打芭蕉个聲音，心肝肚就愁愁慮慮，佢這下還聽著水打在水篷<sup>3</sup>頂，叮叮咚咚、淅淅錫錫个聲音，吵到人日夜煩躁、食睡毋安，比較起來，佢還係較羨慕古人。

夜夜落雨就算吶，連日時頭天一光擘開目珠，就看著滿天个烏烏暗暗，聽著个本本係博人惱个水聲，心情跔等就慍悴起來。在這又溼又冷个天時出門上班、讀書，一路塞車，為著赴時間，大家就少忒耐心，「叭！叭！叭！」个喇叭聲響無停，弄上弄下<sup>4</sup>个奧多拜，危危險險，一下無細義，還會分路過个車仔洩到一身泥漿水。天時毋好，心情跔等毋好，大家完全失忒好天時个平靜摺忍讓。

雨漚無停，佢心肚盡痛个係原本屋前、屋後開到鬧鬧<sup>5</sup>、靚靚

<sup>1</sup> 躁光：音 cau gong`；活潑好動。

<sup>2</sup> 噦噦嘶嘶：音 ve` ve` se` se`；大聲嘶喊。

<sup>3</sup> 水篷：音 sui` pung`；遮雨的棚子。

<sup>4</sup> 弄上弄下：音 nung song` nung ha`；鑽上鑽下。

<sup>5</sup> 開到鬧鬧：音 koi` do nau nau；開得很繽紛的樣子。

个玫瑰、海棠、櫻花，分水涿到落落跌<sup>6</sup>，實在還打爽！毋過，最難為個還係婦人家，因為漚雨，衫晾到無位仔好晾，一屋溼溼落落，拚掃也毋方便，細人仔日日關在屋下，拐就拐毋核<sup>7</sup>，實在辛苦。老人家本來在冷天時做得出去晒啊日頭、打下嘴鼓，這下因為漚雨，僅可坐在屋下啄目睡，也當毋慣。盡得人畏個還係菜錢，青菜因為漚水綿忒，動啊著就起幾下倍，水果也係貴參參仔<sup>8</sup>，買毋落手。生理人也怨怪，冷颼颼个落雨天，打狗就毋出門，生理難做啊！逐儕就想：「這雨到底愛漚到幾時，好停哩！」

有一日，本本係落雨天，佢擎等遮仔、跔等頸筋出門，看一眼滿地个落花，心情就像這天時恁毋好。無想著火車經過莊下時，一片青溜溜个田，錫著佢個眼光，蒔落去無幾久个秧仔，隻隻精神百倍，臥等頭享受雨水个滋潤，一陣風吹來，個個在水中歡喜跳等芭蕾。看著這光景，佢正分醒<sup>9</sup>，天下事總有兩面，有利就有弊、有得就有失、有圓就有缺，毋好總係用自家個立場來看萬事萬物。

「漚雨漚到人就會生菇囉！」儕儕堵著就恁樣喊。毋過，佢這下學會轉換佢個心情，利用漚雨清閒個時節，靜下心來，放慢腳步，用音樂、書本摺咖啡、清茶來配合雨水個節奏，也學會打開心胸，接受落花變做春泥護花个多情、還學會欣賞落雨天種種個詩情畫意。

<sup>6</sup> 落落跌：音 dab dab died`；紛紛掉落。

<sup>7</sup> 拐毋核：音 guai` m` hed；拐騙不住。

<sup>8</sup> 貴參參仔：音 gui sem` sem` e`；昂貴的樣子。

<sup>9</sup> 分醒：音 fun` xiang`；清醒。

【毛蟹】邱一帆原作

日頭下，圳溝肚脣項个石縫仔，伸出毛蟹个兩支大夾，大夾面項絨絨个毛，流水梳到一條一條，對清清个圳水面頂看過去，仰般條理清楚。阿明輕手輕腳，打水尾一步一步行兼該石頭縫，黏邊手一抓，恁注死<sup>1</sup>！手指嘎分毛蟹夾著，目珠窟一下碼灌入大水，痛到緊喊阿姆哀！

毋盼得放過毛蟹，阿明盡命牯愛同毛蟹拉出來，毛蟹也拚命牯退入深深个空肚去，阿明个手毋知仰般嘎在空肚石縫卡著，無法度再過伸入去，也無法度同毛蟹拉出來，出入就毋得！仰結煞？阿明用盡歸身个力，尿就險險洩出來，正同該支左手挪出來！該載正得，手伸得出來，毋過，手指嘎夾著一支毛蟹夾——毋著！係分毛蟹夾夾著，毋得啟正著，這滿該死哩！

夾到緼緼个毛蟹夾，害阿明痛到會夭壽，佢目汁含等，遽遽用正手兩指，硬硬同夾仔挽<sup>2</sup>下來，手指面兩點分毛蟹夾著个痕跡，清清楚楚、鼓血鼓血！阿明心肝肚想：「捉毋著毛蟹，毛蟹

夾乜毋好打爽！連蝦公共下摟佢帶轉去炒，同肉挖來食，再摟厥毛刮忒、串肥料線，拿來做夾仔搞，分人經驗一下分毛蟹夾著个痛……」。

阿明當記得，三十零年前還讀小學時節，分毛蟹夾著個這隻故事！三十年前，小南埔莊外個大河壩、外崗圳、中央圳、莊項個圳溝、脣頭個坑仔，阿明對水頭到水尾哪位就有行過，哪位就有搞過，佢輒常看著毛蟹、釣著毛蟹、食著毛蟹。阿明盡記得，有一擺落大雨、出汶水，佢在坑仔釣毛蟹，毛蟹一擺就兩隻、兩隻分佢釣起來，無一點鐘，就裝滌歸錫桶，佢歡歡喜喜環轉屋下，分阿姆料理。又有一擺做大水個臨暗頭，阿明看著歸群歸群個毛蟹，蹶上石礎，踰著山溝山壁行等上……。

三十年前，哪位就有、麼人就做得捉、麼人就食得著，該河壩、坑仔、圳溝肚個毛蟹，走到哪位去？三十年後，政府大量對中國進口，廢田坵、挖魚塘來畜個毛蟹，講啊著一隻就愛幾下百銀來買，麼人買得起、麼人食得起？阿明實在惱毋解。

<sup>1</sup> 恳注死：音 an` zu xi`；恰巧、剛好。

<sup>2</sup> 挽：音 dui`；急扯。

【阿煥伯个想望】邱一帆原作

熱天，都市肚冷氣緊開緊大，有錢人享受冷氣，無錢个人忍受排出來个熱氣、廢氣，分人走無空園，只因為愛歇在都市，分莊下人認為有出息，就算仰般無品質个生活也愛忍耐再忍耐！火爐堆，分人鍊金鍊銀，正經有較遠？

阿煥伯行到茄苳樹下，坐在大樹下个石頭面，緊想這兩三十年，在都市个生活，敢有麼个意思？便利个交通，無半點人情味；隔壁鄰舍徙來徙去，無半個還有聯絡；物質充足，有食毋忒个浪費、花毋忒个打爽；政治口水噴上噴下，兩三十年來，都市培養當多看高毋看低个目珠，短視近利，其實就像井肚个蛤蟆……。

講正經，還係莊下較贏！阿煥伯緊想緊有道理，莊下个隔壁鄰舍，該種單純、善良同熱情；莊下个自然、恬靜絕對比都市贏加十倍百倍，退休轉莊下，阿煥伯特別有感受。

「蛤蟆 eb eb，屙屎相擲。」阿煥伯還記得有當多个蛤蟆，就在這山溝、山壁肚。暗晡頭，特別係落水過後个暗晡頭，蛤蟆 eb eb 滾个聲，響透山林、山田石礎崁下，這下嘩毋知走到哪位去？

聽隔壁熟絡山林河壩个阿亮仔講，這位還有蛤蟆哦！

毋過，歸個山頭，會分阿煥伯操透<sup>1</sup>、操交咧，還係尋毋著 eb eb 个蛤蟆，阿煥伯毋相信這係事實，阿亮仔講話應該毋會騙人，這下係轉去屋下一個半個都無捉著，見笑哦！阿煥伯行轉茄苳大樹下，等看啊！心肝肚想，係有，蛤蟆應該會出來啊，請遽遽出來哦！

涼風陣陣吹來，阿煥伯耳公聽著緊來緊多个聲音。風吹竹林疏疏滾个聲，穿過娘花叢項沙沙滾个聲，茄苳樹頂飛鼠尋食唧唧喊个聲，還有毋知名个蟲聲，這就係大自然个樂音！大自然个樂音就在阿煥伯个身邊、四圍，阿煥伯恁樣想。竹樹花草也在該自由搖擺，自然个聲響、自然个節奏、自然个律動，一切分人仰般自然个感受，無食酒也會有息把仔醉意啊！就算無捉著蛤蟆，今暗晡也值啦！

<sup>1</sup> 操透：音 cau teu；翻遍。